

**SIGNATUUR
MICROVORM :**

**SHELF NUMBER
MICROFORM :**

M SINO 0477 dl 27

**BIBLIOGRAFISCH VERSLAG:
BIBLIOGRAPHIC RECORD:**

MOEDERNEGATIEF OPSLAGNUMMER:
MASTER NEGATIVE STORAGE NUMBER:

MM69C-100280

KITLV/Royal Netherlands Institute of Southeast Asian and Caribbean Studies

Beng Lee Koen atawa Liong Hong Pwee Tjaij Seng Jan : satoe tjerita di djeman
Goan Tiauw / disalin [dari bah. Tionghoa] oleh Lie Sim Djwe. - Patee :
Semangat, 1930-1931. - 31 dl. (2472 p.). : ill. ; 15 cm. - (Maleisch-magazijn
"Semangat" ; taon 1-2, no. 1-31 (28 Februari 1930-10 Augustus 1931))
Sino-Maleise literatuur. - Novelle
Djil. ka-1/31.

AUTEUR(S)
Lie Sim Djwe

Exemplaargegevens:
31 dl. in 3 bd. (tamat)

Sign. van origineel:
Shelfnr. of original copy:
M hh 8294 N

Sign. van microform:
Shelfnr. of microform:
M SINO 0477 dl 27

Filmformaat / Size of film :
Beeld plaatsing / Image placement :
Reductie moederfilm / Reduction Master film :
Jaar van verfilming / Filmed in :
Verfilmd door bedrijf / Filmed by :

HDP /  16 /  mm
COMIC / IIB
15 : 1
2005
Karmac Microfilm Systems

Maleisch-Magazijn

„Semangat”

Ditributen 2 kali, saben tanggal 15 & 30 boelan Masehi

Hati boeleh kepecahan

SIB berkenalan pada...



Beng Lee Koon

Djilid ka 27.

Penerbit : Uitgeversmij. „SEMANGAT” Parag.



Sehabisnja berkata begitoe, dengan peng-
rasaän oering - oeringan Siauw Hoa balik
poelang dalem astana Loan Hong Kiong
dan langsoeng baringken dirinja di atas pem-
baringan dengan pikiran jang amat koesoet.

Samentara itoe, Soei Lioe jang setelah
mendapat taoe ini kedjadian, djoega toeroet
merasakan sedikit maloe. Sebaliknya Kang
Sam So jang mengikoetin Jan Giok balik
poelang ka astananja sendiri, di sitoe telah
membilang katanja :

„Soekoer sekali jang ini hari, maksoed
marika boekan sadja tiada bisa terkaboel,
tapi berbalik mendapat idoeng pandjang, sa-
mentara Lee Siang maskipoen betoel ada
Beng Sie sendiri, en toch selandjoetnja ba-
kal mendjadi soeker sekali boeat bisa me-
neroesken poela perdjodoannja, kerna dengan
terdjadinja ini kerewelan jang heibat. Dan
tiada bisa disangkal lagi kemoedian Siotjia
pasti bisa perolehken itoe kedoedoekan se-
bagi istri pertama.”

„Kendati kita boleh harep begitoe,” kata-
nja Jan Giok dengan paras berdoeka, „tapi
sekarang soeda njata soeamikoe lagi berada
dalem keadaan jang begitoe djengkel, akoe
wadajib dateng ka sana aken tjoba sebrapa
bisa membri hiboeran padanja, sampe hati-

nja bisa berbalik merasa sedikit lega."

Sehabisnja berkata, Jan Giok lantas djalan menoedjoe ka astana Loan Hong Kiong, tetapi koetika baroe sadja ia hendak melangka masoek pintoe astana, tiba - tiba kedengeran Tiong Hauw Ong lagi memaki katanja :

„Terkoetoe amat itoe kiparat, Lauw Ke Pek, tiada patoet dia boleh mati dengan mait jang oetoe. Tjoba itoe taon, kaloe dia tiada membikin tjilaka seroema - tanggakoe, pastilah sekarang soeda lama akoe mendjadi soemi - istri dengan Beng Sie, serta tiada aken hadepin keonaran sebegimana ini hari. Och, semingkin dipikir, semingkin sakit rasanja hatikoe dan pantes sekali dia ditjintjang sehingga beriboe keping."

Mendenger begitoe, Jan Giok djadi oeroengken niatannja aken masoek ka dalem, kerna koeatir nanti semingkin menerbitken sang soemi ampoenja kemorkahan, begitoe lah kemoedian ia laloe balik masoek ka kraton blakang, doedoek bersama-sama kedoea mertoeanja dan So Taij Nio jang lagi bertjakep - tjakepan dalem berbagi - bagi soeal.

Koetika mana, boedak-boedak prempoean telah menjediaken beres barang-barang hidangan di atas seboeah medja dalem astana

Loan Hong Kiong dan ia mengira Tiong Hauw Ong itoe tempo ada lagi tidoer poeles, sigra djoega ia madjoe mengampirin seraja memanggil katanja :

„Barang - barang hidangan soeda tersedia baik, hareplah Tjian Swee soeka bangoen boeat makan."

Tiong Hauw Ong tinggal diam zonder menjaoet barang sepata kata, samentara si boedak prempoean laloe gerakin tangannja aken paksa orang bangoen, maka Siauwa Hoa jang lagi kegoesaran dan djengkel, mendadak telah melompat bangoen serta dengan zonder oetjapken barang sepata perkataan, ia bantingken sampe bersi segala apa jang ada di medja hidangan itoe, sehingga piring dan mangkok antjoer berantakan tiada keroean roepa di atas djoebin.

Sesoeda itoe, Tiong Hauw Ong kombali berbaring poela di atas pembaringannja. Sedeng boedjang ketjil lekas dateng menjapoe bersi segala petja - petjaan piring mangkok dan itoe boedak prempoean dengan amat ketakoetan boeroe - boeroe lari keloea dari sitoe, dateng ka kraton blakang djoempaken Lo Ong dan Thaij Koen, serta menoetoerken apa jang baroesan kedjadian.

„Tadi pagi Lee Siang ada begitoe morka,

tiadalah heran kaloe anak kita sekarang dja⁴di begini kesel dan maloe," berkata Boe Hian Ong, „marilah kita bersama - sama pergi mengiboer dan memboedjoek padanja, agar soepaja djangan sampe menerbitkan bintjana apa-apa."

Semoea orang dengan berbareng poen la⁴loe sama - sama datang masoek ka dalem astana Loan Hong Kiong. Boedjang ketjil meliat begini, lebi siang lantas merapportken pada Tiong Hauw Ong, jang djadi kepaksa bangoen djoega boeat menjamboet, kemoe⁴dian langsoeng bersama-sama doedoe⁴k dalem astana itoe.

„Biarpoe⁴n Lee Siang memang betoel ada Beng Sie, tetapi djika ditilik dari keadaan tadi pagi, njatalah dia djoega boekan ada saorang jang terlaloe berboedi," demikian Thaj Koen moelai memboedjoek, „dari itoe perloe apa kae⁴ moesti djadi begitoe kesel, hanja sebrapa bisa loepaken sadja ini hal."

„Biasanja Lee In Soe perlakoeken pada anak dengan manis boedi," berkata Siau⁴w Hoa, „maka dalem hal sekarang, amat boleh djadi Gak Hoe sendiri soeda kliroe mengenalkan padanja, sedeng anak dengan tjara geqaba lantas mengambil tindakan begitoe, tiadalah heran In Soe djadi begitoe goesar,

sekalipoe⁴n dia moesti poekoel anak, toch anak aken tiada brani simpen dendeman hati padanja. Tjoemalah jang haroes diboeat maloe, adalah sekalian mantri-mantri dalem keradjaän, nistjaja aken pandeng hina anak poenja perboeatan sebagai satoe orang, jang meloepaken boedi orang serta brani mempermaenken pada goeroenja."

„Kendati ternjata kae⁴ soeda berlakoe kliroe dalem ini hal, toch itoe adalah kerna mendenger Beng Tjhin Ong ampoenja perkataan," kata Boe Hian Ong jang toeroet membri hiboeran, „sedeng tadi dalem kraton kae⁴ soeda tiada brani bikin perbantahan lebi djaoe, jalah djoega kerna mengindahken serta menghormatin pada goeroe sendiri. Ini hari diapoenja kemorkaän masi berkobar-kobar keras, biarlah kita bersabar sadja sampe besok atawa noesa, kae⁴ sendiri boleh pergi koendjoengin padanja boeat mengatoerken maä⁴f. Seande dia soeka trima kedatenganmoe, itoelah menjataken jang dia soeda tiada pikirin lagi kedjadian tadi pagi, sebaliknya bila berkeras dia tiada mae⁴ bertemoe, akoe nanti boleh pergi bersama-sama kae⁴."

Siau⁴w Hoa njataken setoedjoe sekali dengan perbilangan sang ajah.

Begitoelah pada besok paginja, Tiong Hauw Ong beroelang - oelang sampe tiga kali dateng berkoendjoengan di gedong Siang Hoe, tapi selaloe ia belon bisa bertemoepada Lee Siang, kerna menoeroet perbilangannja penggawal pintoe atawa Lee Siang lagi pergi berkoendjoengan, atawa Lee Siang lagi berada dalem kantor di kraton boeat mengoeroes perkerdjaännja.

Koetika Siauwa Hoa balik poelang dalem astananja dengan maksoed jang tersia - sia, Boe Hian Ong soeda membilang katanja :

„Baeklah besok pagi akoe nanti pergi bersama-sama kae.”

Itoe malem orang tidoer njenjak dengan tiada alamin kedjadian soeatoe apa, sedeng pada paginja, sesoeda satoe malem toeroen oedjan keras, sependjang djalanan penoe betjet, tapi Tiong Hauw Ong bersama ajahnja sengadja tiada maoe doedoek djoli, hanja dengan menoenggang koeda teroes menoe-djoe ka gedong Siang Hoe, seperti hendak menoendjoekin marikapoenna niatan jang soenggoe-soenggoe, agar sedikitnja bisa menerbitken djoega Lee Siang ampoenna belas kesian. Demikian tatkala iaorang sampe di tempat jang ditoedjoeken, pakean marika keliatan sebagian besar berlepotan luempoe.

Boedak prempoean masoek merapportken ini hal ka dalem, sedeng So Hoa laloe memboedjoek pada Beng Tong katanja :

„Setelah Lo Ong begitoe soenggoe hati ada toeroet dateng bersama - sama, pantes sekali moesti keloea berdjoeempa.”

„Biarin,” djawab Lee Siang, „akoe poen soeda pikir soeatoe djalan jang sampoerna, soepaja tiada sampe ditjela orang bahoea akoe koerang peradatan.”

Berbareng habis berkata begitoe, Beng Tong lantas titah sang boedak aken bilangin pada penggawal pintoe, jang ia lagi kebetolan berpergian dan belon poelang, mendjadi orang poenna koendjoengan tentoe sadja tiada bisa ditrima.

Lo Ong djadi tjoema bisa meninggalkan sadja iapoenna kaartjes nama, kemoedian bersama sang poetra apabolehboeat balik poelang lagi dalem astananja sendiri. Samentara itoe, sesoeda berselang sedikit waktoe, Beng Tong telah prenta orang pergi ka dekat astana Ong Hoe boeat menjerepin bila Boe Hian Ong dengan Tiong Hauw Ong, kebetolan doea - doea lagi keloea roema, haroeslah lekas - lekas dateng membri raportan padanja.

Tiada lama kemoedian, itoe orang soe-

da balik poelang sembari membri rapportan jang Boe Hian Ong bersama poetranya ini waktōe djoestroe lagi pergi keloea. Maka Lee Siang sigra titah orangnja sediaken djo-li, langsoeng brangkat menoedjoe ka astana Ong Hoe sebagi tjara boeat bales mengoendjoengin.

Setelah sampe di Ong Hoe, penggawal pintoe tentoe sadja membri taoe jang Lo Ong bersama Siau-w Ong kebetoelan doea-doea lagi pergi menenamoē, Lee Siang poen soeda tinggalken sadja iapoenja kaartjes nama, teroes balik poelang ka gedong Siang Hoe. Pada So Hoa ia telah membi-lang katanja :

Marika dateng koendjoengin akoe dan sekarang akoe toch soeda bales mengoendjoengin pada marika, hingga akoe tiada bisa disalaken lagi telah mealpaken peradatan seoemoemnja."

"Ha, ha," djawab So Hoa dengan ketawa, „Siotjia lebi doeloe soeda prenta serepin kebetoelan marika tiada ada di roema, baroe sengadja maoe pergi bales mengoendjoengin, itoe toch ada amat keterlaloean!"

„Begimana akoe boleh dibilang keterlaloean," berkata lagi Beng Tong dengan mesem, „toch segala apa jang dimoestiken oleh

peradatan, akoe telah mendjalanin dengan betoel."

Sjahdan Boe Hian Ong dengan poetranya setelah balik poelang dalem astananja dari berpergian, mendapat denger jang Lee Siang tadi dateng bales mengoendjoengin, marika djadi merasa amat menjesel kerna soeda tiada beroentoeng bisa bertemoē. Samentara Tiong Hauw Ong dengan tiada memboeang tempo lagi, sigra djoega menoenggang koe-danja dateng kombali ka gedong Siang Hoe boeat berkoendjoengan, tapi dari penggawal pintoe di sana, lagi-lagi ia trima penjaoetan bahoēa Lee Siang masi belon poelang dari pergi menenamoē.

Itoe satōe hari, kombali Tiong Hauw Ong telah koendjoengin sendiri Siang Hoe ber-oelang-oelang hingga tiga kali, tapi sekean kali djoega selaloe ia mendapat penjaoetan sama seperti kemaren, begitoelāh beroentoen-roentoen sampe lima hari, tiada djoega ia bisa bertemoē dengan Beng Tong.

„Meninget Lee Siang poenja boedi besar jang telah terlimpa atas diri kitaorang," achir-nja di satōe waktōe Boe Hian Ong kedengeran membilang, „dan sebenernja djoega kitaorang soeda perlakoeken padanja koerang pantes, tiadalah heran dia djadi begitōe mor-

ka. Maka itoe, 'anak, kae haroes bisa bersabar dan berjakin zonder bosen boeat bisa ketemoeken padanja sendiri aken hatoerken maäf, agar soepaja laen orang tiada sampe menjela kita sebagai orang jang koerang penerima dan gampang meloepaken boedi."

"Memang betoel anak senantiasa tiada brani beralpa barang sedikit dalem ini hal," djawab Tjong Hauw Ong, „tetapi, apa maoe dibikin, In Soe masi selaloe menolak dengan berbagi-bagi alesan boeat bertemoemoe moeka."

Begitoelahr itoe seisi roema jang kepoetoesan daja, pada merasakan tra - enak tidoer dan tra - enak makan, berdiri dan berdoedoek poen serba sala. Sebaliknja Kang Sam So dengan menggoenaken itoe koetika baek, telah mengasoet katanja:

"Ja," inilah semoea ada bisanja Soei Lioe saorang, kerna dari diapoenna banjak bitjara sehingga menerbitken onar begitoe roepa."

"Bener sekali," membetoelken Thaj Koen, „kaloe tiada itoe soendel poenna banjak moeloet, pastilah belon tentoe bisa kedjadian hal sedemikian."

"Tetapi," menjangkal Siauw Hoa, „Gak Hoe dan Gak Boe sendiri soeda menerangkan prihal itoe pertemoean, mendjadi Soei Lioe tiada boleh terlaloe disalaken telah ber-

lakoe lantjang dalem ini hal."

"Mengingat Lee Siang sebagai orang moe-da tentoe sadja tiada bisa terloepoet dari berdara panas, maka setelah dia merasa tiada seneng atas ini kedjadian, pastilah tiada begitoe gampang dia maoe lantas bertemoemoe moeka, sekalipoen perkoendjoengan dilakoe-ken beroelang - oelang," demikian Jan Giok toeroet tjampoer bitjara, „tetapi Tjhiap denger jang dia dengan Nio Hoedjin ada idoe-roekoen dan saling menjinta, dari itoe Tjhiap pikir lebi baek Tjhiap sendiri nanti dateng koendjoengin Soe Nio, memoehoen padanja dengan sanget boeat dia soeka toeloeng bitjaraken pada In Soe, brangkali kemoedian ada harepan maksoed bertemoemoe bisa kesampean."

Mendenger ini perkataän, Tjong Hauw Ong keliatan djadi beroepa sanget girang, kemoedian membilang katanja:

"Hoedjin poenna pikiran ini soenggoe bagoes sekali, besok pagi boleh sigra pergi ka sana, selaen apa jang dimaksoedken, djoega masi ada satoe kegoenaän besar dengan Hoedjin poenna perkoendjoengan ka sana. Itoe hari waktue Beng Hoe antarken barang santapan ka Siang Hoe, boedak jang disoe-roe perna menerangkan Nio Soe Nio itoe

sebenernja ada So Taij Nio ampoenja poetri: Siapa tadinja poen telah perna berada di gedongmoe di harian menika, maka bolehlah kaoe tjoba perhatikan dengan teliti, adakah itoe perbilangan tiada kliroe. Tetapi, Hoedjin, biar begimana djoega, sekali-kali djanganlah kaoe boeka soeara dalem ini hal, soepaja tiada sampe timboel poela laen matjem keanaran."

"Itoelah djangan slempang," berkata Jan Giok, "Tjhiap tentoe nanti berlakoe ati-ati boeat tiada bitjara sembarangan."

"Kaloe Siauw Lie bisa mempoenjai per-oentoengan begitoe bagoes, tentoelah tiada aken kedjadian baroe sadja dia terlahir, si-gra djoega ajahnja telah meninggalkan padanja," berkata So Taij Nio, "maka itoe perloe apa sekarang moesti zewelken poela hal ini."

"Tetapi, nasib orang siapa bisa taoe," katanja Boe Hian Ong dan Thaij Koen dengan berbareng.

Kemoedian Jan Giok balik poelang ka dalem kamarnja sendiri, serta membilang pada Kang Sam So:

"Dengen mengambil ini tindakan, akoe berhasil boeat membikin soeamikoe djadi bergirang dan bersoekatjita, akoe harep per-

kerdjaänkoe nanti tiada djadi sia-sia."

"Tetapi," berkata Kang Sam So, "apabila soeda kenalken Nio Hoedjin betoel sekali ada So Jan Swat, poelangmoe kemari djanganlah bilang sebenernja atawa lebi baek berdjoesta dengan bitjara sebaliknja."

"Kenapa akoe moesti berdjoesta?" tanja Jan Giok dengan bingoeng.

"Oh, djadinja Siotjia masi belon mengarti," kata poela Kang Sam So, "maka dengerlah, So Jan Swat itoe kaloe bener ada Nio Hoedjin, tentoelah setida-tidanja dia sekarang ada teritoeng mendjadi poetrinja Nio Siang. Seande Siotjia bitjara sebenernja, pastilah di hari blakang dia bakal mendjadi istri jang kadoea, sedeng kaoe traloepoet aken teritoeng sebagi goendik jang katiga, hingga itoe gadis dari satoe baboe-tete, berbalik bisa mengambil kedoedoekan lebi atas dari kaoe sendiri. Masalah dalem hatikoe bisa merasa seneng dan poeas dengan ini keadaan."

"Oh, ja," achirnja berkata Jan Giok seperti orang baroe tersedar, "tjoba seandjenja tiada lebi doeloe kaoe mengingetken ini hal, ampir sadja akoe membikin diri sendiri mendjadi kepiran."

Besok pagi-paginja, Jan Giok setelah ber-

dandan rapi atawa berpamitan dari mertoea dan soeaminja, sigra djoega ia doedoekin satoe djoli sederhana jang dipikoel oleh empat orang, berikoet bebrapa pengiring dengan seboeah pajoeng koening sebagai pemboeka djalan, serta doea orang boedak prempoean jang mengikoet di blakang djoli, langsoeng berangkat menoedjoe ka gedong Siang Hoe.

Apabila sampe di depan pintoe besar dari Siang Hoe, itoe djoli poen sigra dibrentiken, sedeng penggawal pintoe sigra djoega masoek merapport ka dalem, jang oleh boedak prempoean telah disampeken poela pada madjikannja.

„Tiada pantes dikaloe akoe jang moesti ketemoeken dia,” berkata Lee Siang pada So Hoa setelah mendengar rapportan begitoe, „baeklah kae sadsja sendiri lantas djoempaken dia.”

„Akoeh toeh perna dateng di gedongnja, maka dia tentoe bisa kenalkan roepakoe sampe baek, „hingga nanti bisa menerbitken hal-hal jang koerang enak kapan akoe jang moesti ketemoeken padanja.”

„Ha, ha,” kata lagi Lee Siang dengan ketawa, „di antara sepoeloe prempoean tentoe ada sembilan jang mempoenjai tabeat tjemberoean, maka biarpoe dia bisa kenalkan

padamoe, toeh kapan dia soeda poelang, bisa dipastiken dia tiada aken mae bitjara sedjoedjoernja; dari itoe, djanganlah kae berslempang poela.”

„Perbilangan ini djoega ada betoel,” berkata So Hoa, „tapi sekarang sesoeda dia kirim istrinja dateng kemari, kae tentoe mae berdjandji nanti soeka djoempaken padanja.”

„Kaloeh ini kali tiada bikin dia djadi kapok betoel-betoel, laen kali dia tentoe masi brani pandeng enteng padakoe,” saet Lee Siang, „sekarang kae boleh lantas pergi ke loear dan perlakoeken padanja dengan hormat serta pantes.”

„Tapi kaloeh dia minta hendak ketemoeken kae, begimana akoe nanti moesti membri penjaoetan?” tanja poela So Hoa.

„Kae boleh menolak sadsja dengan alesan jang akoe masi berada dalem kerepotan,” djawab Beng Tong.

So Hoa trima baek itoe pesenan, lantas membawa empat orang boedak prempoean dateng di roengan pertengahan blakang, sambil titah memboeka pintoe besar boeat silahken djoelinja Lauw Sie masoek ka dalem dan brenti di depan halaman blakang, di mana Jan Giok keliatan toeroen dari djoli-

nja, sedeng So Hoa pelahan pelahan baroe berbangkit dari kedoedoekannya boeat dateng menjamboet.

Lekas djoega Jan Giok bisa mengenalin bahoea dia itoe bener ada So Jan Swat. Kemoedian ia lantas bertindak naek ka atas Thia, samentara So Hoa lakoeken penjamboetan selajiknja, sembari membilang katanja:

„Tiada mengetahoei lebi siang atas Hoedjin ampoenja kedatangan, maka soeda ber-alpa aken menjamboet lebi djaoe, hareplah soedi dimaäffen!”

Jan Giok boeroe-boeroe madjoe ka depan, djatoken dirinja berloetoet di hadapan So Hoa, seraja mengoetjap:

„Sebagi Tjhiap jang tiada berharga, begimana brani menjapeken Soe Nio boeat dateng menjamboet.”

So Hoa poen dengan tjepet angkat bangoenin pada Jan Giok, sembari membilang:

„Hoedjin soeda mendjalanken kehormatan begitoe berat, begimana Tjhiap sanggoep menerima.”

„Laki Tjhiap jalah ada In Siang ampoenja Boen Seng,” berkata poela Jan Giok, „tjara begimana Tjhiap boleh tiada mendjalanken kehormatan dengan berloetoet.”

„Sebaliknja Tjhiap dengan Hoedjin toch

sama sama ada orang prempoean,” kata So Hoa, „maka perloe apa moesti memake oepatjara begini”

Sehabisnja oetjapken ini perkataan, So Hoa lantas hendak goenaken peradatan setjara toean roema dengan tetamoenja boeat berdoedoek saling berhadapan, tapi Jan Giok menampik beroelang-oelang, sampe achirnja kerna njonja roema memaksa djoega dengan sanget, apabolehboeat setelah mengatoerken maäf, Jan Giok berdoedoek sebegimana diminta. Sedeng boedak prempoean sigra dateng menjoegoeken thee.

„Itoe hari Tjhiap poenja soeami kerna kliroe mendenger Beng Liong To ampoenja perbilangan,” demikian katanja Jan Giok sehabis minoem thee, „soeda berlakoe begitoe gegaba aken menerbitken In Soe ampoenja kemorkahan, sekarang dia mengarti dan menjesel sekali telah perboeat soeatoe kedosaän jang begitoe besar, di roema dia djadi tiada enak makan dan tiada enak tidoer, maka Tjhiap sengadja dateng kemari, aken moehoen Soe Nio ampoenja perteloengan soepaja memintaken ampoen di hadapan In Soe.”

„Boeat ini, Tjhiap djoega soeda perna memperingetin beroelang - oelang padanja, tapi sebagai orang lelaki traeroeng diapoenja

tabeat ada kakoe dan keras," berkata So Hca, „hingga Tjhiap poen djadi kepoetoesan akal."

„Kaloe begitoe," Jan Giok membilang poela, „moehoenlah Soe Nio toeloeng oendang In Soe dateng kemari, soepaja Tjhiap nanti bisa djoempaken sendiri aken memintaken keampoenan boeat soeamikoe."

So Hoa poen lantas titah saorang boedaknja, pergi oendang Siang Ja keloe ar kemari boeat bertemoe. Sang boedak sigra berdjalan masoek aken lakoe ken itoe prenta, sebentar lagi ia soeda keloe ar kombali sembari membilang katanja:

„Loja bilang, ini waktoe djoestroe lagi repot mengoeroes kewadajiban, mendjadi tiada ada kesempatan boeat bertemoe, baeklah Laurw Hoedjin djangan menoenggoe poela."

„Ja, sesoeda soeamikoe tiada mempoenjati kesempatan boeat bertemoe," So Hoa membenjamboeng bitjara, „biarlah Tjhiap nanti sebrapa bisa menjampeken Hoedjin poenja permintaän padanja."

„Seande betoel In Soe ini tempo masi belon sempet," berkata Jan Giok dengan soenggoe-soenggoe, „baeklah Tjhiap menoenggoe sadja kendati sampe malem, Tjhiap tiada aken brani poelang dengan pertjoema."

„Tapi soeamikoe ternjata ada terlaloe repot," kata So Hoa, „djanganlah Hoedjin menoenggoe dengan sia-sia."

„Seisi roema dari Tjhiap poenja soeami ini waktoe berada dalem kebingoengan jang heibat, berdoedoek sala berdiri poen sala," berkata Jan Giok lebi djaoe, „masakah Tjhiap poenja hati bisa merasa seneng boeat balik poelang sadja dengan tiada membawa harepan apa-apa. Dari itoe, Tjhiap perloe menoenggoe sampe soeda bisa djoempaken sendiri pada In Soe, moehoenlah Soe Nio tiada oendjoekin keberatan aken Tjhiap boleh doedoek menoenggoe di sini."

So Hoa prenta pada boedak prempoeannja masoek ka dalem, aken kasi taoe kombali pada Lee Siang jang Lauw Hoedjin keras djoega hendak menoenggoe sampe bisa berdjoempa, maka itoe harep Siang Ja biar begimana djoega repot, soekalah keloe ar sebentar boeat bertemoe.

Sang boedak poen lantas masoek kombali ka dalem, ketemoeken Beng Tong dan rapportken tentang Jan Giok poenja niatan keras minta bertemoe.

„Ja, soedalah," achir-achir Beng Tong djadi membilang, „seentar akoe nanti keloe ar."

Berbareng berkata begitoe, Lee Siang sigra berbangkit dari tempat doedoeknja, bertindak menoedjoe ka Houw Thia ; samentara boedak prempoean terseboet boeroe - boeroe soeda berdjalan keloear lebi doeloe, seraja me-rapport :

„Sin Siang lagi mendatengin kemari !“

So Hoa dan Jan Giok berbareng pada berbangkit dari kedoedoekannja, berdiri me-noenggoe kedadatangannja Lee Siang. Sebentar lagi, keliatan kree pintoe terbentang dengan pelahan, Lee Siang soeda melangka keloear dan Jan Giok tjoeri memandeng orang poenja roman moeka. Maka tertampak romannja Lee Siang mirip sebagi sekoentoem mawar bekas keodjanan ; bibirnja mera, giginja poeti ; pinggang langsing dan ketjil molek ; matanja bening laksana aer di moesim Tjhioe. Pakean, kopiah dan kasoetnja antero keliatan amat sederhana. Dengan tindakan lemes dan satoe-satoe, Beng Tong lagi djalan mendatengin.

Memandeng begitoe, dalem hatinja Jan Giok djadi kagoem, mengalem dan tertjam-poer rasa takoet, kerna iapoenja keangkeran dari pangkatnja tiada merasa telah menjipta-ken seroeпа pengaroeh yang bisa bikin orang merasa ketakoetan. Begitoeelah dengan ter-

gopo-gopo, Jan Giok lantas djatoken dirinja berloetoet di djoebin sembari mengoetjap :

„In Soe jang termoeia. Tjhiap Lauw Sie dateng berdjoempa !“

„Mengapa Hoedjin moesti mendjalanken kehormatan begini roepa,“ berkata Lee Siang jang membaes hormat dengan mengangkat kedoea tangannja, „membikin He Khoa ran-sanja tiada sanggoep menerima.“

Kemoedian ia berpaling pada So Hoa, seraja membilang :

„Toeloenglah angkat bangoenin pada Lauw Hoedjin.“

So Hoa poen boeroe-boeroe menoentoen Jan Giok bangoen dan berdiri di samping, sambil menajoera kombali ia membilang katanja :

„Lantaran kliroe mendenger Beng Liong To ampoenja bitjara, maka di itoe hari Tjhiap poenja soeami telah mengambil tindakan tje-robo menerbitkan In Soe ampoenja kemor-kan. Sekarang ini dia sendiri soeda menjesel atas dosanja jang begitoe besar, menitah Tjhiap dateng kemari boeat memoehoen-ken In Soe ampoenja keampoenan bagi dirinja, demikian dia tentoe aken bersoekeor tiada habisnja.“

„Ja, kendati He Khoa ini ada beroemoer

masi terlaloe moeda," mendjawab Lee Siang sambil membaes hormat poela, „tapi toch soeda perna doea kali mendjadi kapala examen, hingga mempoenjai boekan sedikit Boen Seng. Tjoemalah kerna He Khoa mempoenjai kebiasaän soeka merenda serta mengindahken pada siapa djoega, sampe kedjadian He Khoa senantiasia dipandeng enteng oleh orang serta tiada soengkan permaenken diri He Khoa. Maka biarlah selandjoetnja He Khoa aken berlakoe sombong dan angkoe terhadep siapa djoega.“

LXIV.

Kepingin menjampeken napsoe, Seng Tjong bermaen dalem taman. Mempertahanken adat-istiadat, Lee Siang mengarang sairani.

„Dan dalem pengrasaän sendiri," meneroesken Beng Tong lebi djaoe, „He Khoa pertjaja selamanja ada perlakoeken Tjong Hauw Ong setjara manis dan menghormat, tapi siapa kira dia berbalik bisa goenaken kesempatan selagi He Khoa berada dalem kantoor examen, masoekin rekest dengan roepa-roepa soeal jang mendjelekin dirikoe. Seoemoer idoe He Khoa selaloe tiada berkiser dari kedjoedjoeran dan ketoeloesan, baik-boeroek He Khoa soeka bitjara berdepan dan teroes-terang, sekali-kali He Khoa tiada perna mendendem hati barang sedikit. Tetapi sebaliknja kaloe laen orang, boleh djadi soeda menjimpen panasaran dalem hatinja dan inilah He Khoa tiada aken berboeat. Melaenken He Khoa berharep biarlah laen kali dalem segala perkara, orang djangan berlakoe terlaloe tjerobo dan gegaba. Nanti bila Hoedjin telah poelang, bolehlah kasi taoe jang He Khoa sama sekali tiada ada mendendem maoepoen menjimpen

panasaran dalem hati, harep Tiong Hauw Ong djangan terlaloe pikirin apa jang soeda kedjadian. Tapi, tjoema lantaran ini perkara jang tiada berarti, soeda moesti menjapeken aken Hoedjin sendiri datang berkoendjoengan kemari, itoelah ada koerang pantas."

Lantas Beng Tong berpaling kombali pada So Hoa dan berkata :

„Soekalah Hian Tjhe prenta menjediaken sedikit perdjamoean goena Lauw Hoedjin, samentara He Khoa tiada bisa meladenin lebi lama lagi, hareplah dimaäffen perbanjak."

Sehabisnja berkata-kata, Lee Siang sigra balikin dirinja masoek ka dalem, sedeng So Hoa lantas silahken Jan Giok berdoedoek kombali, kemoedian berkata dengan ketawa:

„Soeamikoe poenja adat ada kakoe dan sedikit brangasan, dalem segala perkara memang betoel dia selaloe soeka bitjara teroesterang dan dengan berdepan, selamanja belon perna soeka menjimpen pengrasaän apa-apa dalem hati. Djikaloe Hoedjin soeda poelang, bolehlah bilangin Tiong Hauw Ong datang berkoendjoengan kemari boeat bertemoe, serta djangan terlaloe bimbang hati."

Jan Giok mengatoerken banjak trima kasi atas kebaekannja itoe Soe Nio, sedeng dalem

hati ada berpikir-pikir, bahoea Lee Siang bener sekali mempoenjai paras jang tjantik melebiken gambaran, tjoemalah itoe hawa keangkeran dari kebesarannja traloepoet mendatengken rasa djeri bagi orang jang sedeng berhadapan padanja. Kemoedian Jan Giok lantas minta pada So Hoa, soepaja ia djoega boleh bertemoe dengan Keng Hoedjin serta iboe poengoetnja Lee Siang.

„Ke Boe ini waktoe lagi koerang enak badan," berkata So Hoa, „maäffen dia tiada bisa bertemoe."

Sebaliknja So Hoa laloe prenta boedak prempoeannja aken pergi mengoendang Soen Kiong Djin boeat keloear bertemoe; lebi djaoe So Hoa djoega titah aken lekas menjediaken satoe medja perdjamoean.

Sebentar lagi, boedak prempoean keliatan telah balik kombali, seraja membri rapportan katanja :

„Soen Kiong Djin hanja menjoeroe Dji le Nio datang kemari boeat mewakilin."

Jan Giok poen lantas berbangkit dari tempat doedoeknja, madjoe ka depan djoempaken itoe kedoea goendik dari Khong Dja San, sambil djalanken oepatjara kehormatan antara sepanteran sendiri.

„Soen Kiong Djin menjampeken banjak

trima kasi atas Hoedjin ampoenja boediketjintaän," berkata kedoea goendik itoe, „tapi kerna merasa diri sendiri bekas prempoean pedoesoenan, tiada mengarti peradatan lagi goblok, mendjadi soengkan bertemoe dengan Kwi Djin, maka itoe sengadja menitah Tjhiap berdoea datang kemari boeat mengoendjoekin rasa soekoernja."

„Ha, Thaij Soe Boe ternjata soeda berlakoe terlaloe merenda," berkata Jan Giok, „sebaliknja sekarang telah menjapeken Dji Ie Nio datang kemari, soenggoe membikin Tjhiap merasa berat sekali boeat menerima."

Kedoea goendik itoe setelah oetjapken poela sedikit perkataan selakoe merenda, sigra djoega hendak permisi boeat balik masoek kombali ka dalem, tapi So Hoa dengan tjepet menarik tangan orang, sembari berkata :

„Oh, Dji Ie Nio, djanganlah kesoesoe balik poelang, marilah kita bersama-sama temenin Lauw Hoedjin doedoek minoem arak, soepaja di sini tiada djadi terlaloe kesepian."

Kedoea goendik itoe setelah hatoerken trima kasi dan maäf, lantas doedoek bersama-sama di sitoe. Sedeng tiada antara lama, medja perdjamoean poen keliatan telah

diatoer beres, maka ampat njonja ini laloe pada pinda berdoedoek hadepin itoe medja perhidangan, dilajanin oleh boedak-boedak prempoean jang sebentar-bentar toeangin arak dan soegoeken barang santapan. Begitoelah tertampak orang doedoek makan-minoem dengan bernapsoe dan goembira sekali, serta tiada brenti-brentinja bertjakepan berbaga-bagi soeal jang meresep.

Dalem begitoe, So Hoa djadi berpikir jang iapoenja soeami ternjata mempoenjai banjak ketabahan dan ketjakepan, masakah ia sendiri tiada bisa meniroe barang sedikit; dari itoe kedengeran ia menanja pada Jan Giok :

„Adakah Hoedjin sekarang soeda moelai doedoek peroet?"

„Ach," saoe Jan Giok, „kendati betoel Tjhiap poenja pernikahan telah dilangoengken, tapi sampe sekarang masi belon perna bertjampoer tidoer. Soeamikoe soeda mene-tepken persoempahan, bila soeda bertemoe dengan Beng Siotjia, baroelah dia maoe koempoel tidoer sama Tjhiap. Sampe sekarang, Tjhiap poenja soeami masi selaloe tidoer sendirian saban malem dengan hanja menemenin itoe gambaran dari Beng Sie."

„Sedari ampat taon berselang Beng Sie

telah linjap dengan tiada ketaoean ka mana parannja," berkata So Hoa, „Tiong Hauw Ong perloe apa moesti berlakoe sampe begitoe roepa."

„Ja, soeamikoe soeda berdjandji pasti hendak mendjalanken tjoekoe tiga taon ampoenja kaboengan bagi Beng Sie, Tjhiap tentoe tiada-boleh-tiada moesti menoeroet sadja," djawab lagi Jan Giok, „tetapi di itoe hari, sewaktoe dilangsoengken perkawinan, In Soe di tenga-tenga perdjamoean perna membilang jang Soe Nio lagi hamil, setaoelah boelan kapan dateng temponja bersalin?"

So Hoa jang sama sekali tiada perna bersedia, tatkala mendadak mendapet denger ini pertanjaan, dalem hatinja djadi bingoeng memikirin jang perkawinan antara doea orang prempoean, moestail amat bisa kedjadian hamil. Sekoetika itoe, keliatan selebar moekanja So Hoa telah beroba mera saking maloenja, tapi achir-achir ia menjaoet dengan pengra-saan djenga:

„Sebetoelnja Tjhiap belon perna hamil sama sekali."

„Khong Wangwe seringkali bilang bahoea kaeorang berdoea soemi-istri jang sama-sama beroesia moeda, apa sebab soeda menika tiga taon poenja lama, masi tiada

bisa perolehken poetra maoepoen poetri," begitoe lah berkata kedoea goendik itoe dengen ketawa besar, „siapa njana kaeo berdoea selaloe bisa menjimpen resia begitoe rapet, soeda ada poenja kandoengan dalem peroet tiada hendak tjeritaken pada kitaorang. Moedjoer sekali ini hari Lauw Hoedjin soeda memboeka itoe resia, sehingga kitaorang tiada dapet diklaboein poela terlebi lama. Ja, kitaorang tentoe nanti menjampeken ini warta girang pada Wangwee."

Diam-diam So Hoa djadi mengeloe dalem hatinja, seande Khong Wangwee betoel-betoel nanti menagi tjoetjoe padanja, begimana ia moesti bri penjaoetan.

„Ini semoea meloeloe ada diapoenja perkataan setjara maen-maen," achirnja So Hoa menjaoet poela, „soenggoe-soenggoe akoe tiada mempoenjai kandoengan."

Tetapi biar begimana djoega So Hoa menjangkal, en toch kedoea goendik itoe roepanja masi tiada pertjaja.

Marika landjoetken makan dan minoem sampe sekoetika lamanja poela, baroe Jan Giok menjataken trima kasi serta moehoen berpamitan, sambil berkata:

„Moehoen Soe Nio menjampeken pada In Soe, Tjhiap poenja oetjapan trima kasi boeat

ini perdjamoean, begitoe djoega bila besok Tjiap poenja soemi dateng berkoendjoengan kemari, hareplah ditrima berdjoeempa."

"Inilah soeda moesti," djawab So Hoa, „biarlah Hoedjin tiada berslempang hati poela."

Lagi sekali, sesoeda mendjalanken oepatjara berpamitan pada So Hoa dan itoe kedoea bini moeda dari Khong Wangwe. Jan Giok langsoeng doedoekin djolinja dan berdjalan pergi. Sedeng Dji Ie Nio balik poelang ka tempatnja sendiri, adalah So Hoa djoega telah masoek kombali ka dalem kamarnja sendiri, di mana ia bertemoed dengan Lee Siang, jang menanja katanja :

„Adakah Lauw Sie soeda berlaloe?"

„Soeda poelang," djawab So Hoa dan sesoeda berpaling kiri - kanan, ternjata tiada ada laen orang di sitoe, dengan bersenjoem ia manarik pada Beng Tong sambil berkata: „Aneh, kenapa Siotjia moesti berlakoe begitoe edan, di blakang akoe koe tjeritaken kedjelekan akoe pada laen orang?"

„Apatah jang akoe soeda bitjara djelek boeat koe poenja adres?" balik menanja Beng Tong dengan keheranan.

„Tiada bisa djadi koe loepa, jang koe toch perna tjeritaken di hadapan orang ba-

njak, bahoea akoe soeda mengandoeng baji." saoenja So Hoa. „Hm, perkawinan di antara doea orang prempoean, djikaloe akoe sampe bisa hamil, tidakah nanti bakal terlahir doea orang baji dengan berbareng, jalah jang satoe keloeur dari peroetmoe Ha, ha, tidakah koe ternjata soeda berlakoe gilaän?"

„Heran," menjangkal Beng Tong. „pada siapa akoe perna bilang jang koe ada lagi doedoek peroet?"

„Jalah baroesan Lauw Sie soeda kata begitoe," kata lagi So Hoa, „dia bilang, di waktoe harian nikanja, koe sendiri telah njatakan ini omongan pada Boe Hian Ong dan didenger djoega oleh sekalian tetamoetetamoe jang lagi berhadlir dalem pesta perdjamoean."

Sekarang baroe Lee Siang bisa inget betoel dan membilang :

„Oh, ja, itoe hari Boe Hian Ong mendesek hendak kirim djoli boeat mengoendang padamoe dengan sanget koendjoengin pestanja, maka sebagi alesan menolak, apa bolehboeat akoe bilang sadja jang koe lagi hamil, hingga dia poen djadi tiada brani memaksa poela."

„Alesan begini maskipoen tjoekeop ba-

goes," berkata So Hoa, „tetapi Dji le tentoe nanti sampeken ini kabar pada Khong Wangwe, blakang hari nistjaja Khong Wangwe meminta diapoenna tjoetjoe dari akoe, hingga akoe djadi tiada terloepoet dari seroepa maloe dan djadi boeah-terta-waän orang seroema "

„Tiada apa," berkata lagi Beng Tong, „akoe sendiri nanti bisa membri penjaoetan tjoekoep sampoerna dalem ini soeal."

Maka terseboet Jan Giok, sesampnja di astana Ong Hoe, ia dapetken semoea orang masi ada doedoek menoenggoe dalem pertengahan blakang, jang dengan tiada sabaran begitoe meliat Jan Giok dateng, sigra berreboet menanja bagaimana kesoedahannja dari itoe perkoendjoengan dalem gedong Siang Hoe.

Jan Giok menoetoerken satoe - persatoe apa jang soeda terdjadi, hingga inilah membikin seisi roema itoe berada dalem kegiatan dan bersoekoer, sambil kemoedian menanja dengan ampir berbareng :

„Betoelkah Nio Soe Nio itoe ada So Jan Swat?"

Lauw Sie sebagai satoe orang jang djoe-djoer dan toeloes hati, merasa berat sekali aken bitjara djoesta, maka setelah terme-

noeng sedjoeroes lamanja, baroelah ia menjaet dengan soeara oga-ogahan :

„Tempo hari Tjhiap melaenken bertemoemoeka dengan dia boeat seklebatan sadja, mendjadi Tjhiap tiada bisa mengenalin be-toel parasnja, tapi kaloe menoeroet penglihatan, rasa - rasanja seperti boekan ada So Kho Nio."

„Soeda berkali-kali akoe bilang jang akoe tiada bakal mempoenjai peroentoengan begitoe bagoes," berkata So Taij Nio sambil mengela napas pandjang, „memanglah tiada bisa djadi sebegimana didoega."

„Ja, memang ada satoe kelangkahan besar kaloe bisa terdjadi hal kebetoelan begitoe roepa," Tjong Hauw Ong toeroet membilang, „tentoe sekali dia itoe boekan ada So Kho Nio. Tapi boeat ini hal, njata soeda membikin tjape pada Hoedjin, soenggoe akoe merasa tiada enak di hati."

„Boeat goenanja soeami - istri, bagaimana moesti dibitjaraken tentang ketjapean," saet Jan Giok dengan pengrasaän hati jang boenga, „besok pagi kaloe Siang Kong dateng ka sana, tentoelah aken dapet penjamboetan tjoekoep manis."

Tjong Hauw Ong membenerken itoe perkataän dan begitoelah orang djadi boebaran

serta pergi mengaso.

Besoknja, waktœ masi pagi-pagi sekali, Siauwa Hoa telah manœnggang koedanja datang ka gedong Siang Hoe. Tapi pengawal pintœ telah merapportken bahœa Lee Siang lagi toeroet bersidang dalem kraton.

„Baeklah,” berkata Tiong Hauw Ong, „akœ aken menœnggoe sadja dalem kamar tetamœ.”

Sehabisnja berkata begitœ, Tiong Hauw Ong sigra lompat toeroen dari toengganganja dan berdjalan masœk ka roeangan tetamœ, serta doedoek menœnggoe di sitœ sampe siang, sedeng Lee Siang belon djoega keliatan poelang.

Sebentar lagi, orang-orang Siang Hoe telah menjediaken baek sebœah medja perhidangan, sambil membilang katanja :

„Lee Siang ampoenja Hoedjin kerna slem-pang Tjian Swee kelaparan, maka itœ titah kitaorang soegoeken ini sedikit barang santapan, hareplah Tjian Swee soedi dahar senjangnja dan tiada soengkanan.”

Siauwa Hoa mengarti inilah tentœ ada hasil dari ketjapeannja sang istri kemarenja, kemoedian ia lantas menjaœt katanja :

„Hareplah toeloeng menjampeken akœ-

poenja oetjapan trima kasi atas Soe Boe ampoenja perhatian jang begini besar.”

Sambil oetjapken itœ perkataan, Tiong Hauw Ong moelai doedoek makan-minœm saorang diri dengan dilajanin dengan radjin oleh itœ bebrapa orang boedjang. Dan se-soedanja makan kenjang, orang-orang lantas pergiken poela itœ medja perdjamœan, sedeng Siauwa Hoa kombali doedoek menœnggoe sehingga liwat tengahari, barœlah kedengeran Lee Siang balik poelang.

Tiong Hauw Ong boeroe-boeroe kelœar menjamboet, sembari membri hormat katanja :

„Boen Seng soeda kliroe mendenger Gak Hoe ampoenja ketrangan, sehingga menerbitken In Soe ampoenja kemorkahan, moenœnlah soedi dibri keampœnan.”

Lee Siang dengan tjepet toeroen dari djo-linja, angkat bangoenin pada Siauwa Hoa seraja membilang :

„He Khoa selamanja tiada soeka menjimpen pengrasaân apa-apa dalem hati, sebaliknja kalœ ini kedjadian terdjadi pada laen orang, nistajalah marika aken mendendem hati, maka itœ boeat keblakangan, dalem segala perkara djangan soeka berlakœe terlalœe tjerobo, hanja pikir mateng sebelœnnja didjalanken.”

Siauw Hoa trima baek itoe peringetan sambil mengatoerken banjak trima kasi, sendeng Lee Siang lantas silahken Tiong Hauw Ong datang berdoedoek di roeangan pertengahan blakang.

Samentara itoe, pengawal pintoe telah datang merapportken katanja :

„Tiong Hauw Ong sedari pagi sekali telah datang di sini dan menoenggoe teroes-teroesan sehingga ini waktoe.”

„Oh, kiranja begitoe,” berkata Lee Siang, „hajo lekas sediaken medja perdjamoean boeat Tiong Hauw Ong menahan lapar.”

„Trima kasi,” berkata Siauw Hoa sambil mendjoera, „tiada perloe In Soe menjapeken hati poela, baroesan Boen Seng telah menerima koerniaännja Soe Nio jang hadiaken satoe perdjamoean.”

Beng Tong djadi berpikir dalem hatinja, sesoenggoenja So Hoa itoe ada saorang jang mempoenjai pri-ketjintaän begitoe anget, koeatir orang djadi lapar lantas perloeken menjediaken makanan.

„Kaloe begitoe, itoelah baek sekali,” kemoedian ia menjaoet.

Kombali orang saling membitjaraken bebrapa soal jang tiada terlaloe penting, aken achirnja Tiong Hauw Ong laloe berpamitan

balik poelang ka astananja, serta menoetoerken pada kedoea orang toeanja dan laen-laen, tentang kebaikannja Lee Siang soeami-istri, hingga membikin seisi roema itoe djadi pada bergirang dan bersoekatjita.

Sebaliknja Beng Tong, sepoelangnja Tiong Hauw Ong, poen sigra balik masoek ka dalem kamarnja sendiri, memboeka iapoenja pakean kebesaran.

„Sedari masi pagi sekali Tiong Hauw Ong soeda datang menoenggoe,” berkata So Hoa, „adakah kae soeda ketemoeken padanja?”

„Ja, dia sekarang soeda poelang,” djawab Lee Siang, jang sembari memandeng kirikan tiada ada laen orang, lantas meneroesken perkataännja sambil ketawa, „Tji-tji ternjata amat menjinta, koeatir dia kelaparan, maka dengan menoeroet kemaoean hati sendiri telah mendjamoe padanja.”

Selebar moekanja So Hoa djadi berobama, ia berkata djoega dengan ketawa :

„Ach, Siotjia poen ternjata ada saorang jang koerang penerimaän! Akoe slempang kaeopoenja ketjintaän nanti kelaparan, maka dengan niatan soetji akoe kepaksa kasi dia makan dan minoem aken goenamoe. Tapi kae boekan sadja tiada hargaken orang

poenja kebaekan, malah berbalik tjerita djelek atas dirikoe. Baeklah, laen kali aroe maoe biarken sadja dia kelaparan, dengan zonder ambil perdoeli apa-apa jang tiada bersangkoetan dengan dirikoe."

"Soedalah, kaoe traoesa menjangkal poela," Beng Tong menggoda semingkin getol, "kaloe dia itoe ada akoepoenja ketjintaän, akoe sendiri toch bisa mengoeroes sampe baik, tiada perloe dengan kaoepoenja pertoe-loengan."

"Itoe djoega betoel," kata So Hoa lagi dengan mengamboel, "ja, laen kali akoe tiada aken ambil taoe orang laen poenja oeroesan."

Tetapi semandjek itoe waktoe dan selanjoe, pertemoean dalem keradjaän antara Lee Siang dengan iapoenja enko dan ajah, maoepoen tentang iapoenja perlakoean terhadap Tiong Hauw Ong, Beng Tong moelai keliatan berlakoe adem, tiada sebegimana itoe keangetan dan keresepän koetika jang soeda-soeda. Sebaliknya baginda Seng Tjong jang semingkin djadi tergila-gila pada ketjantikan dan kebidjaksanaänja Beng Tong, senantiasä mentjari kesempatan dan daja boeat bisa poenjaken dirinja itoe mantri jang tertjinta.

Saben-saben baginda tentoe titah Thaij Kam Koan Tjiang aken selaloe lakoeken penjelidikan di Lwe Kok, manakala ketaoean Lee Siang ada membekel kasoer dan bantel dateng di sana, haroeslah lekas membri rapportan padanja.

Achirnja orang sampe pada tanggal Siegwee Tjap-go, waktoe mana Lee Siang ternjata ada membekel kasoer dan bantelnja dateng di Lwe Kok, sebab perloe menginep di sitoe aken memberesken oeroesan jang kebetoelan terlaloe repot. Maka di depan Lwe Kok, kebetoelan Lee Siang menampak Koan Tjiang ada lagi berdiri di moeka pintoe memandang-mandeng kembang, sigra djoega ia madjoe mengampirin dan setelah saling membri hormat, Lee Siang berkata:

"Silahken Kong Kong bersama sama masoek ka dalem boeat berdoedoekan"

"Tjoema kebetoelan berdjalan-djalan di sini, biarlah Thaij Soe djangan menjapeken hati," saoenja Koan Tjiang.

Lee Siang poen sigra berdjalan masoek ka dalem Lwe Kok, samentara Koan Tjiang boeroe-boeroe dateng ka kraton Tong Beng Tian, djoempaken sri-baginda sambil merapportken halnja Lee Siang poenja kedatangan di Lwe Kok dengan membekel ka-

soer dan bantelnja.

Seng Tjong djadi amat girang mendenger itoe rapportan seraja menanja :

„Di dalem Lwe Kok masi ada siapa poela?“

„Djoega ada Nio Siang bersama Beng Liong To,“ djawab Koan Tjiang.

„Kaloe begitoe.“ bersabda lagi sri-baginda, „kaoe boleh pergi menoenngoe lagi di deket Lwe Kok, apabila menampak Nio Siang dan Beng Liong To soeda poelang, bolehlah kae oendang Lee Siang datang kemari dan bilang Tim mengadjak padanja aken bermaen-maen dalem taman Siang Lim Wan boeat meliat-liat boenga.“

Koan Tjiang trima itoe titah poen sigra berlaloe dari sitoe, tetapi sebelonnja berdjalan djaoe, baginda soeda panggil balik padanja seraja membilang :

„Lee Siang ada mempoenjai keradjinan dan kegiatan loear biasa mengoeroes perkerdjaannja, kaloe membilang hendak bermaen-maen dalem taman, nistjalah dia belon tentoe mae datang kemari, dari itoe lebi baek kae bilang sadja padanja ada oeroesan penting berhoeboeng dengan oendangkoe.“

Kembali Koan Tjiang berlaloe dari sitoe

aken mendjalanken itoe titah.

Samentara itoe, di Lwe Kok, Nio Siang telah membilang pada Lee Siang :

„Setelah Hian Saij datang kemari, biarlah akoe poelang sadja.“

„Lo Hoe djoega mae poelang,“ kata Beng Soe Goan,

Kedoea mantri besar ini sigra djoega bersama-sama keloea dari Lwe Kok dan tiada lama kemoedian, Koan Tjiang keliatan masoek ka dalem, sembari membilang pada Lee Siang katanja :

„Atas titahnja Ban Swe Ja, mengoendang Lee Sianseng datang di kraton Tong Beng Tian boeat bitjaraken sedikit oeroesan penting.“

„Oeroesan apakah itoe?“ menanja Lee Siang.

„Ban Swe Ja hanja bilang hendak tanjakan seroepe oeroesan negri,“ djawab Koan Tjiang.

Lee Siang laloe mengikoet Koan Tjiang datang sampe di depan pintoe Tong Beng Tian, di mana Koan Tjiang lebi doelo masoek merapporsten ka dalem, sedeng baginda lantas prenta boleh silahken sang mantri masoek bertemo.

Koetika Lee Siang telah berada di dalem

dan mendjalanken oepatjara berdjoempa selajiknja, baginda silahken Beng Tong boleh mengambil tempat doedoek, samentara Thaij Kam ketjil lekas menjoegoeken thee wangi.

„Setaoelah berhoeboeng dengan oeroesan apa Pihe telah prenta memanggil Sin dateng kemari?“ kemoedian menanja Lee Siang setelah minoem setjangkir thee.

„Fadjar tadi seliwatnja oedjan santar, Tim doega berbagi-bagi kembang dalem Siang Lim Wan, tentoelah rata rata mengoendjoekin keindahanja dari kemegaran.“ begitoelah sabdanja baginda, „sedeng Sianseng sekean lama berkerdja tjape goena negri, Tim ingin sekali aken bisa bersama-sama bikin sedikit pelantjongan dalem taman, boeat mengilangkan sebagian dari ketjapean itoe.“

„Soeda diniat hendak bermain dalem taman,“ kata Lee Siang dengan pengrasaän koerang seneng, „apa sebab Pihe moesti belaga bilang ada berhoeboengan dengan oeroesan negri?“

„Kerna Tim pikir Keng terlatoe radjin dan giat dalem perkerdjaän, seande bilang teroes-terang hendak bermain dalem taman, pastilah Sianseng tiada maoe dateng kemari,“ bersabda lagi baginda, „ini sebab Tim terpaksa pake alesan maoe bitjaraken oesoesan

negri.“

„Ini hari Pihe maoe bermain dalem kebun, membilang hendak bitjaraken oeroesan penting; sebaliknja laen kali djika betoel-betoel hendak perdameken oeroesan negri, boleh djadi Sin aken mengira hanja tjoea hendak bermain dalem taman,“ kata Beng Tong lebi djaoe. „hingga achirnja keddjadian orang tiada dapet bedaken antara oeroesan penting dan tiada penting, berbareng banjak perkara bakal mendjadi gagal. Dari itoe, Sin moehoen dengan sanget soepaja laen kali Pihe tiada nanti keloearken poela perkataän berdjoesta seperti ini. Apalagi sebagi Nio Siang dan Beng Liong To, jang kedoeanja ada mendjadi mantri toea sedari djeman Sian Te, tadi poen masi berdiam dalem Lwe Kok, sepantesnja djikaloe memang Pihe bermaksoed hendak bermain dalem taman, toch marika itoe wadjib djoega diadjak sekalian, tiadalah moesti menoenggoe sampe marika berlaloe, baroe Sin dipanggil masoek kemari. Inilah ada satoe tjara jang tiada adil.“

Baginda djadi moesti mengakoe, sesoenggoenja Beng Tong poenja perkataän dan alesan ada sanger adil dan beratoeran. Orang prempoean sematjem dia, memang soeker

sekali aken bisa ditjari boeat kadoeanja. Tapi kemoedian baginda laloe berkata lagi sebagi penjaoetan :

„Kembang jang rontok masi bisa megar poela, sebaliknya orang jang soeda beroesia toea tiada aken bisa berbalik moeda lagi. Maka bila orang jang telah beroesia tinggi memandang kembang, gampang sekali mendatengken peri dan loeka dalem hatinja. Itoe sebab, Tim djadi tiada bergoembira boeat adjak sekalian Nio Siang dan Beng Liong To. Tapi Tim sekarang ada beroesia doea-poeloeempat taon, sedeng Keng baroe tjoe-ma sembilanblas taon, pantes sekali sabensaben sama membikin plezieran dalem kebon sambil memandang boenga.”

Zonder menoenggoe lagi orang poenja pendjawaban, baginda sagra titah pengiring-pengiringnja lekas sediaken kendaraännja, kemoedian baginda beringin aken Lee Siang soeka berdoedoek sama-sama satoe kendaraän, dengan harepan nanti bisa rasaken baoean jang sedep dari si eilok ; begitoelah baginda membilang :

„Dari sini boeat sampe ka Siang Lim Wan, boekan ada perdjalanang jang terlaloe deket, dari itoe Tim perkenanken boeat Keng bersama-sama doedoek dalem kendaraän

Tim.”

Lee Siang berpikir dalem hatinja, manakala ia menoeroet ini kemaean, blakang hari djikaloe sesoedanja ia menjalin pakean, orang tentoe aken mendoega djelek atas dirinja, atawa menoedoeh jang ia perna berlakoe serong dengan baginda keizer ; sagra djoega ia menjaoet dengan lekas :

„Radja dan mantri bersama-sama satoe kendaraän, itoelah berarti membikin kaloet oendang-oendang negri, biarlah Sin mengikoet dengan berdjalan kaki.”

„Boeat sampe ka Siang Lim Wan, masi ada bebrapa paal ampoenja perdjalanang,” bersabda poela Seng Tjong. „Tim bardoe-doek kendaraän, sedeng Keng berdjalan kaki, itoelah bakal membikin Tim tiada merasa leloeasa, biarlah bersama-sama doedoek kendaraän sadja.”

„Tetapi, biar bagaimana djoega Sin tiada aken brani membikin kaloet itoe peradatan dan kemoestian antara radja dengan mantrinja,” memoetoes Lee Siang.

Diam-diam baginda djadi mengalem se-senggoenja inilah ada satoe gadis jang sanget gaib dan soetji, tiada sedikit djoega maoe bikin dirinja bertjipratan noda jang bisa meroesakin nama kehormatannja.

„Kaloe Sianseng soeda berlakoe begitoe soenggoe - soenggoe,” achirnja baginda kepaksa membilang, „baeklah, Tim aken bersama Keng masing - masing menoenggang koeda, agar djadi lebi leloeasa.”

Lee Siang poen tiada kebratan dengan itoe tjara.

Sebentar lagi, orang soeda bawa dateng doea ekor koeda toenggangan. Baginda menoenggang koeda Gin Hauw Ma, samentara Lee Siang adalah menoenggang koeda Ngo Beng Ma. Begitoeulah kemoedian ini radja dan mantri sigra petjoet koedanja menoedjoe ka depan, sedeng ampat orang Thaij Kam dengan memikoel krandjang jang berisi arak serta berbagi - bagi masakan sajoeran ada mengikoetin dari blakang.

Sepandjang djalan baginda selaloe ingin aken bisa berendeng dengan Lee Siang, tapi sebaliknja sang mantri sebrapa bisa tjari djalanan boeat lolos, atawa sebentar di moeka, atawa sebentar di blakang, sehingga itoe perdjalanan tiada bisa kedjadian dengan berendeng. Inilah semingkin-mingkin membikin baginda djadi indahken betoel pada Lee Siang.

Achirnja orang sampe di Siang Lim Wan. Berbagi - bagi kembang dan reroempoetan tertampak toemboe megar dan soeboer, se-

hingga membri soeatoe pemandangan jang menjegerken mata Sekean banjak boeroeng-boeroeng jang bermaen maen di atas tana roempoet, meliat orang dateng sigra berterbangan kian - kemari Di sitoe djoega terdapat seboeah boekit jang tinggi, di tengatenga dari sebagian boekit ada keliatan aer toempa jang mengalir toeroen tiada brentinja, mirip segoeloeng benang perak jang pandjang sekali.

Dari djaoean orang menampak sekiternja itoe ada dikoelilingin oleh boekit-boekit dan goenoeng-goenoeng palseo, jang antero moelai bersemi roempoet-roempoet moeda, sehingga keliatan mirip seperti satoe goeloeng tali boender jang berwarna idjo.

Di kedoea samping rata-rata toemboe banjak matjem kembang-kembang jang djarang tertampak di loearan, sedeng di tengatenganja terboek a satoe djalanan pandjang jang lempeng.

„Pemandengen dalem tamannja baginda keizer, soenggoe ada amat langka, indah dan adjaib!” demikian achirnja Lee Siang djadi memoedji-moedji.

Baginda tinggal bersenjoem dengan tiada menjaoet soeatoe apa. Tapi dengan pengraasaan amat bergoembira, ini radja dan mantri

landjoetken teroes perdjalanannja dengan pelahan-pelahan, sebentar bentar brenti memandeng ka kanan dan ka kiri, sampe achirnja orang datang di satoe djembatan jang terbikin dari antero batoe-batoe poeti. Di sini orang brentiken koedanja lebi lama boeat memandeng sepoeasnja, keliatan di kedoea samping djembatan ada toemboe bilang blas poehoen-poehoen Jang Lioe jang besar dan lebat, hingga orang dapet menedoeh dari serangannja matahari begimana keras djoega. Di bawah djembatan mengalir satoe telaga ketjil dan tjetek, tapi aernja keliatan bening sekali. Sepasang boeroeng lajangan lagi mandi dan bermaen-maen dalem aer, sedeng di antara poehoen Jang Lioe kedengeran soera njanjiannja bebrapa matjem boeroeng laen.

„Njatalah pemandangan di sini ada terlebi-lebi indah poela,” kata Lee Siang dengan kegirangan, „soenggoe soeker boeat ditoetoerken kebagoesannja dengan sedjelas-djelasnja.”

„Ja,” djawab baginda dengan bersoekajita, „inilah jang dinamaken Tjhoen Lioe Tjiok Kio.”

Dalem begitoe, Thaij Kam soeda datang mempersembahkan arak pada itoe radja dan

mantri, dan demikian orang laloe minoem kering tiga glás arak. Koetika mana, baginda menampak Lee Siang poenja roman moeka jang oendjoek sedikit warna semoemera, ibarat menangin itoe kembang-kembang jang sedengnja megar, hingga dengan pengrasaän jang bergontjang keras, baginda angkat sang petjoet di tangan menjamboek satoe kali dengan sekerasnja pada dahan Jang Lioe jang berdeketan, membikin bebrapa tetes aer djato menjiprat di moekanja Beng Tong

Lee Siang djadi berpikir dalem hatinja, apa sebab dengan begitoe mendadak baginda seperti hendak mempermaenken padanja? Apakah tiada boleh djadi baginda sekarang soeda mengetahoei iapoenja penjaroean? Tapi dengan tangan badjoenja ia seka itoe aer jang menempel di moekanja, sedeng romannja mengoendjoek seperti orang tiada seneng hati. Inilah tamba-tamba membikin baginda poenja hati djadi bergerak keras.

Tiada lama poela, orang soeda toeroen dari djembatan terseboet, selandjoetnja orang menampak berbagi-bagi kembang seperti saling bereboetan boeat kebagoesan dan keindahan, demikianpoen pepoehoenan dan

reroempoetan antero tjoekeop menarik pemandangan dengan marikapoena keidoepan jang soeboer.

„Kembang dan roempoet pada maen bagoes-bagoesan,” ahirnja Lee Siang membilang pada Koan Tjiang, „membikin boeta orang poenja hati dan mata. Soenggoelah tiada sala sebeginimana orang bilang: Di langit ada terpadet sorga, sebaliknya di doenia adalah astana dan taman dari keizer.”

Koan Tjiang membenerken itoe perbilangn. Samentara baginda jang selaloe tiada lepaskan intjeran matanja pada Lee Siang, dapet liat di atas idoengnja sang mantri masi menempel doea tetes aer, djoega kopiahnja itoe tempo ada terletak sedikit miring di atas kapalanja, hingga inilah menambaken soemarak bagi kaeilokannja.

„Maskipoen itoe berbagi - bagi kembang keliatannja begitoe bagoes dan indah,” begitoeelah sabdanja baginda keizer, „tetapi antero masi kala djaoe dengan Lee Sianseng ampoenja roman jang tjantik dan jang boleh disamakan seperti sekoentoem boenga jang berdjawa “

Lee Siang sekarang mengarti betoel-betoel bahoea baginda tentoenja soeda mengetahoehi bahoea dirinja ada satoe prempoean, maka

kedjadian beroelang-oelang itoe keizer oendjoek sikep mengganggoe padanja. Tetapi sebagai satoe radja jang bidjaksana, biarpoen taoe iapoenja resia, en toch tiada boleh-tiada moesti mengarti djoega bahoea sesoeatoe prempoean wadjab sekali bisa mendjaga betoel kesoetjian dirinja, bagaimana sekarang berbalik boleh oendjoekin sikep begitoe roepa, seolah - olah hendak melakoeken soeatoe perboeatan jang tiada lajik. Berpikir begini, aermoeanja Lee Siang djadi mengoendjoek sorot kegoesaran.

Meliat Lee Siang lagi goesar, baginda berpendapetan parasnja ia itoe djadi keliatan semingkin tjantik dan semingkin menarik hati. Diam - diam baginda berpikir, ini malem ia bakal tiada maoe kasi liwat pertjoema, se-bisa-bisanja Lee Siang moesti ditahan sampe maoe menginep di sitoe, agar soepaja maksoed hatinja bisa ketoeroetan.

Setelah menetepken ini pikiran, baginda laloe membilang pada Lee Siang :

„Hawa oedara rasanja terlaloe panas, marilah dateng ka itoe paseban praoe-praoean boeat mentjari angin, atawa maen tjatoer boeat mengilangkan tjape.”

Lee Siang poen menoeroet itoe adjakan, begitoe kemoedian ini radja dan mantri ke-

liatan soeda datang sampe di tepi kolam. Besarnja itoe kolam ada bebrapa bauw, sekternja teparit dengan batoe-batoe kali jang berkembang. Pada keempat podjoknja ada toemboe poehoen - poehoen Jang Lioe jang besar dan lebat; di sitoe ada terdapat tangga batoe boeat toeroen ka praoe, sedeng di bawah tangga ada teriket satoe praoe ketjil.

Thajj Kam lebi doeloe toeroen ka bawah tangga, atoe dan bawa itoe praoe ketjil mepet betoel dengan tangga, baroelah kemoedian silahken itoe radja dan mantri toeroen ka praoe. Kemoedian praoe terseboet lantas didajoeng menoedjoe ka itoe paseban model kapal-kapalan jang terletak di tenggatanganja kolam.

Apabila sampe, praoe itoe lantas diiket baik, sedeng di satoe samping dari paseban terseboet poen ada terdapat satoe tangga. Baginda dan Lee Siang sagra naek ka atas, serta mengambil tempat doedoek di dekat kapala kapal, sebentar lagi marika keliatan moelai maen tjatoer. Thajj Kam soeda bawa datang arak berikoet barang-barang santapan, atoe baik di seboeah medja hadapan itoe radja dan mantri. Demikian, sambil minoem arak dan gado barang santapan, sambil orang bermaen tjatoer, sedeng angin jang

aloes saben-saben datang menioep dari djoe-roesan moeka aer, hingga orang dapetken seroeпа pengrasaän jang amat njaman.

Ini keadaan soenggoe menjenengken amat bagi Beng Tong, saking goembiranja ber-roentoen - roentoen ia bisa menang hingga doea kali dari tiga kali maenan.

Pelahan-pelahan matahari moelai dojong ka barat, maka Lee Siang achirnja kedengeran membilang katanja:

„Hari bakal lekas mendjadi malem, Sin perloe lantas balik poelang ka Lwe Kok boeat mengoeroes perkerdjaän.”

Baginda belaga membetoelken itoe perbilang, maka kemoedian ini radja dan mantri lantas toeroen poela ka praoe ketjil, langsoeng balik kombali ka tepi kolam, dari mana orang lantas menjuenggang koeda aken berdjalan pergi.

„Di Thian Hiang Koan meloeloe ada ditanem kembang Botan,” begitoe bersabda baginda setelah berdjalan sedikit djaoe, „pemandangan di sitoe adalah satoe - satoenja paling indah, Sianseng tiada - boleh - tiada koendjoengin itoe tempat boeat poeaskan pemandangan”

„Oh, Botan jalah ada seroeпа kembang di langit,” berkata Beng Tong dengan ber-

girang. „memang betoel ada amat ketjiwa djika tiada meliat.”

Ini radja dan mantri berikoet sekalian pengiringnja sigra djoega menoedjoe ka Thian Hiang Koan. Apabila sampe, orang toeroen dari toenggangannja masing-masing, laloe bertindak masoek ka dalem, maka keliatanlah di kedoea samping itoe, bilang ratoes pot jang tertanem Botan. Sebelah kiri meloeloe toemboe Botan poeti dan sebelah kanan antero idoe Botani mera. Terantar dengan angin aloes, baean wangi rada-rada menioep masoek ka lobang idoeng.

Lee Siang djadi amat boenga, sambil menepok-nepok tangan ia berkata dengan ketawa goembira :

„Sesoenggoenja ini tempat bisa dibalang ada mendjadi kediaannja dewa-dewa di langit!”

„Ja,” sabda Seng Tjong dengan tiada mengilangkan waktu baek, „lebi lagi di koe-tika terang boelan doedoek minoem arak di sini, soenggoe amat menjenengken!”

„Sin tiada brani aken tiada mengiringin titah Pihe,” djawab Lee Siang dengan penoe kegoembirahan.

Kemoedian ini radja dan mantri laloe sama-sama datang berdoedoek di roengan

pertengahan dari Thian Hiang Koan. Di mana baginda titan Thaij Kam lekas sediaken medja perdjamoean. Tapi samentara itoe Lee Siang mendadak dapet pikiran, bahoea sri-baginda mengoendjoek sikep-sikep dari niatan koerang baek, sigra djoega ia menampilkan katanja :

„Sin poenja oeroesan masi banjak belon beres, biarlah sekarang djoega lantas poelang ka Lwe Kok boeat mengerdjaken.”

„Ha, ini waktu kita berada dalem keadaan aman-sentosa, segala perkerdjaan negri toch boleh ditoenda sampe besok,” mende-sek poela baginda, „sewaktu hadepin terangnja remboelan dan megarnja kembang jang ternama, kita djadi membikin ketjiwa kemashoerannja Botan djika zonder minoem.”

Lee Siang kombali berpikiran, Seng Tjong ada satoe keizer jang arif-bidjaksana, biar-poen mengetahui dirinja ada orang prem-poean, toch moestail amat maoe lakoeken soeatoe perboeatan jang tiada halal. Kemoedian ia lantas berdoedoek teroes di sitoe, sedeng Thaij Kam soeda pasang bebrapa banjak palita, hingga membikin roeangan itoe djadi keliatan terang-menderang; begitoe djoega medja perhidangan telah disediakan.

Demikian orang doedoek makan-minoem sampe malem dan Lee Siang kombali njataken iapoenja maksoed boeat balik poelang ka Lwe Kok, tapi sebaliknja baginda ingin sang mantri doedoek minoem teroes sampe sepoeasnja.

LXV.

Di Thian Hiang Koan belaga mabok mengoendjoek kegoesaran. Di Kim Loan Tian dengan paksa mene-
tephen perkawinan.

Apabila soeda minoem lagi bebrapa tjankir arak, Beng Tong lantas berbangkit dari tempat doedoeknja, hatoerken trima kasi boeat itoe perdjamoean sembari berpamitan. Tapi baginda kombali menahan dengan sanget seraja bersabda :

„Soeker sekali bisa diketemoeken koetika jang begini bagoes, remboelan terang gilang-goemilang, angin sedep membri rasa njaman, mengapalah begitoe kesoesoe Keng soeda hendak berlaloe, biarlah minoem lagi sehingga mabok.”

Apabolehboeat Lee Siang kombali berdoedoek teroes, sedeng itoe koetika soeda ampir djam satoe malem. Moekanja Lee Siang kerna arak keliatan mirip si kembang Tho Hoa, inilah membikin baginda poenja napsoe birahi djadi berkobar-kobar seperti dibakar, dengan tiada sabaran membilang pada Beng Tong sembari ketawa :

„Memandeng Keng poenja roman begini tjantik, tiadalah heran Tiong Hauw Ong

sampe mengeloearken perkataän edan-edanan begitoe roepa, sedeng Tim djoega bisa ketoeroetan djadi seperti gila, belon taoe apa Keng nanti soedi oendjoek belas kesian pada Tim? Sekarang hari soeda djaoe malem, biarlah kita berbaringan bersama-sama satoe pembaringan, sambil beroendingan hal - hal jang berhoeboeng dengan kepentingan keradjaän."

Berbareng dengan habisnja ini oetjapan, baginda lantas memanggil datang saorang Thaij Kam, menitah padanja boeat pergi mengasi taoe pada penggawe - penggawe di Lwe Kok, soepaja djangan menoenggoe poela, lantaran Lee Siang hendak menginep di sini.

Mendenger perkataän begitoe, Lee Siang sigra berbangkit dari kedoedoekannja dan dengan moeka penoe sorot kegoesaran, ia berseroe katanja :

"Kong Kong, bolehlah traoesa pergi, akoe djoega aken lantas balik poelang!"

Kemoedian berpaling pada baginda keizer; ia meneroesken katanja :

"Selamanja Sin berkerdja goena negri ada menoeroet keadilan, sekali - kali tiada taoe berlakoe tjoerang, tjoemalah tersebab memanggoe djabatan tinggi dalem oemoer masi

terlaloe moeda, moentjoellah itoe perbilangan bahoela Sin ada saorang prempoean, samentara sekarang Pihe djoega telah oetjapken perkataän begitoe, tjara begimanalah Sin boleh berdiam lebi lama dalem itoe kedoe-doekan, maka biarlah Sin lantas meletakkan djabatan boeat poelang di kampoeng sendiri. Apalagi mantri dan radja sama - sama masi beroesia moeda, seande kedjadian moesti tidoer dalem satoe pembaringan, orang loear nistjaja aken menoedoe, bahoela pangkat besar jang dipangkoe oleh Sin, jalah soeda diperolehken dari djalan pande bermoeka-moeka serta mengambil hati. Dan orang nanti bakal bilang apa tentang Pihe poenja tjara dan keadilan?"

"Lantaran hendak meroendingken oeroesan negri, maka Tim telah menahan tidoer sama-sama, sekali - kali tiada mengandoeng laen maksoed," bersabda baginda lebi djaoe, "djikaloe bener Keng ini ada orang prempoean, tiada bisa disangkal lagi ada mendjadi Tiong Hauw Ong ampoenja istri jang pertama, moestail amat Tim maoe mengganggoe boeat melanggar adat kesopanan; sebaliknja bila Keng keras menolak, malah aken menerbitken orang poenja bitjara jang tida - tida."

„Meroendingken oeroesan negri, hanja ke-
djadian di bawah sinarnja api palita jang
terang-menderang,” berkata Lee Siang, „se-
baliknja dengan djalan berbaringan sama-
sama, tjara begimana orang bisa leloeasa
lakoeken peroendingannja.”

„Baginda Han Kong Boe perna tidoer
satoe randjang bersama Giam Tjoe Leng.”
Seng Tjong membilang lagi, „sampe seka-
rang orang soehoerin marika itoe seperti
satoe radja dan mantri jang bisa bergaoelan
rapet. Apabila Sianseng menginep di sini,
djikaloe orang loear brani bitjaraken apa-apa
jang tiada pantes, Tim boleh lantas djatoken
hoekoeman mati.”

Berbareng berkata begitoe, baginda mera-
sa tiada sanggoep kendaliken poela sang
napsoe jang soeda menjala begitoe heibat,
mendadak baginda oeloerken tangannja me-
narik Lee Siang poenja sebagian pakean,
seraja membilang lagi setjara orang memoe-
hoen dikesianin :

„Sianseng menginep sadja di sini, ja?”

Lee Siang brontak dari pegangan begitoe,
sambil berseroe dengan soeara keras :

„Pertemoean antara radja dan mantrinja,
masing - masing wadjab memegang betoel
segala peradatan ! Sekarang, ini Pihe di wak-

toe malem boeta hendak memaksa Sin ti-
doer bersama-sama, itoelah berarti satoe ke-
nodahan bagi Sin poenja nama kebesaran.
Maskipoen Sin ada sacranggoblok, tapi sekali-
kali tiada aken bisa menoeroetin ini kehen-
dakan !”

Setelah menampak Lee Siang poenja ro-
man dan soeara sama sengitnja, begitoe
adem dan begitoe soetji jang soeker boleh
diboeat permaenan, baginda boekan sadja
tiada mempoenjai harepan lagi, malah merasa
djoega dirinja berada di fihak jang sala.
Sigra djoege ia angkat bangoenin pada Lee
Siang, sambil bersabda :

„Ja, inilah semoea ada Tim poenja kekli-
roean, biarlah Keng djangan simpen di hati,
sedeng sebetoelnja adalah kerna mengingat
hari soeda djaoe malem dan perdjalanana ada
djaoe, mendjadi Tim telah mengambil ke-
lantjangan begitoe. Kaloe Keng sekarang
berkeras djoege hendak balik poelang ka
Lwe Kok, ja, bolehlah lantas poelang.”

Berbareng baginda laloe titah Thaij Kam
boleh sediaken telong aken mengantar Lee
Siang poelang kombali ka Lwe Kok. Begi-
toelah Koan Tjiang dengan memegang palita
lantas membawa Lee Siang balik ka Lwe
Kok. Tatkala sampe di sitoe, bebrapa orang

penggawe keliatan masi ada menoenggoe di depan pintoe kantoran

Lee Siang lebi doeloe mengatoerken trima kasi pada Koan Tjiang, baroe kemoedian berdjalan masoek ka dalem; sedeng Koan Tjiang sigra balik kombali ka Thian Hiang Koan boeat membri rapportan pada baginda.

Baginda memesen pada sekalian Thaij Kam-Thaij Kam tiada boleh banjak bitjara tentang segala kedjadian baroesan, sebaliknya dalem hati adalah berpikir saorang diri, katanja :

„Tiada njana di doenia ini boleh ada sa-toe gadis jang begitoe loear biasa! Tiada takoet pada kematian, tiada seraka pada kemoeliaän, soenggoe membikin orang moesti taro indah sanget padanja. Pertjoema Tim telah goenaken berbagi-bagi daja, tapi tiada sedikit djoega bisa terkaboel apa jang diharep.“

„Baroesan baeknja djoega Tim soeda lekas-lekas soeroe orang antarken dia poelang, sehingga dia tiada sampe djadi goesar betoel-betoel,“ berpikir poela baginda, „tetapi menilik dari sini, njatalah itoe gadis soeker bisa diganggöe, sebaliknya diapoenna paras jang sanget tjantik dan kepinteran jang begitoe tinggi, Tim tentoe tiada maoe brenti

sampe di sini, biarlah keblakangan Tim berlakoe lebi giat dan lebi ati-ati, siapa taoe brangkali hatinja bisa berbalik.“

Itoe malem, baginda tetep menginep di Thian Hiang Koan.

Samentara Lee Siang sepoelangnja di Lwe Kok, langsoeng ia masoek ka dalem kamar dan baringken dirinja di atas pembaringan. Dalem hatinja poen traloepoet telah kenangken apa jang tadi kedjadian di Siang Lim Wan, sembari kemoedian membilang saorang diri :

„Biarpoen ternjata baginda soeda mengandoeng niatan koerang baik, tapi toch tiada brani berlakoe terlaloe memperkosa, soenggoelah boleh diboeat soekoer. Tetapi bagaimana djoega, nistjajalah baginda telah korbanken dengan sia-sia pikiran dan ketja-peannja, masakah akoe maoe berboeat apa-apa jang meroesakin kesoetjian dirikoe? Moelai ini malem dan selandjoetnja, lebi baik akoe djangan menginep lagi di sini, soepaja tiada sampe alamin seroeapa bintjana jang tiada terdoega.“

Setelah berpikir begitoe, Beng Tong pelahan - pelahan bisa tidoer poeles.

Besok paginja setelah balik poelang dalem gedongnja, Beng Tong teroes menoedjoe ka

kamarnya sendiri, atawa sesoeda bertemoë dengan So Hoa, mendadak ia djadi ketawa besar.

„Ada hal apakah jang membikin kaöe djadi begini girang?“ menanja So Hoa dengan keheranan

Beng Tong lantas menoetoerken segala apa jang kedjadian tadi malem.

„Memang djoega Siotjia ampoenja ke-tjantikan ada amat langka, menarik mata orang dan menggioerken hati orang,“ berkata So Hoa, „tapi sekarang sesoedanja baginda mengetahoei kaöe ada orang prempoean, haroeslah lekas-lekas berdaja boeat meletakin djabatan.“

„Sekarang masi belon perloe begitoe kesoesoe aken meletakin djabatan,“ berkata Beng Tong, „kendati baginda soeda mengetahoei aköe ini ada satoe prempoean, tapi toch baginda tiada brani berlakoe sembarangan dan setjara memboeta. Samentara apa jang dioendjoeikin tadi malem, djoega bisa dibilang ada perboeatan jang lemah-lemboet dan sopan - santöen, hingga orang boleh pertjaja dan hargaken padanja. Asal sadja keblakangan aköe tiada tidoer poela dalem Lwe Kok, pastilah tiada bakal sampe kedjadian poela apa-apa jang koerang enak.“

So Hoa achirnja poen membetoelken itoe perbilangan.

Demikianlah semandjek itoe waktöe, kaloe kebetoelan banjak soerat-soerat jang moesti dioeroes, Lee Siang tentoe bawa poelang dan mengerdjaken dalem gedongnja sendiri; sedeng bila soerat - soerat tiada begitoe banjak, sebelonnja malem Lee Siang pasti telah balik poelang dalem gedongnja. Tiada lagi ia taoe menginep di Lwe Kok.

Baginda koetika mendapat taoe ini hal, dalem hatinja semingkin - mingkin menghargai dan mengindahken perboeatannja itoe gadis.

Sang waktöe berdjalan begitoe pesat, oe-pama kata mirip anak pana terlepas dari boesoernja, hingga sebentar sadja orang telah sampe pada tanggal moeda dari boelan Gogwee. Itoe Hang Liong dari bilangan Hoen Lam jang mengantarken anak prempoeannja djoestroe soeda sampe dalem kota radja.

Marika sewa satoe gedong besar boeat tempat kediamannja samentara waktöe. Hang Liong bersama poetrinja dan sekalian boedak-boedak serta boedjang - boedjangnja, mengambil tempat di bagian kanan dari gedong itoe, samentara bagian kirinja adalah ditempatken oleh An Tie Koan bersama sekalian

pengiring - pengiringnja.

Sesoeda semoea apa diatoer beres, marika laloe berdame tentang berbagi - bagi soeal manakala mengadep baginda keizer.

„Apabila soeda berada di hadapan baginda keizer, haroes sekali kaue bisa berlakoe ati - ati,” begitoelah memesen Hang Liong pada poetrinja, „kerna segala kekajaän dan segala kemoeliaän melaenken tergantoeng pada ini pergerakan.”

„Mengandel atas anak poenja ketjerdikan dan kebisaän, traoesa koeatir apa sadja jang baginda nanti hendak membikin pertanjaän, anak pasti bisa membri penjaoetan satoe-persatoe sampe beres,” djawabnja Hang Lam Kim dengan gaga.

Besok paginja, Hang Lam Kim lekas djoe-ga soeda berias rapi serta berdandan beres, kemoedian laloe naek ka djoli dengan di-ikoetin oleh boedak Tjhioe So dari blakang. Begitoe djoega An Tie Koan bersama Hang Liong poen doedoeck djoli, langsoeng bersama-sama berangkat menoejdoe ka kraton.

Apabila orang sampe di depan pintoe Ngo Boen, masing-masing laloe toeroen dari djo-linja. Dan An Tie Koan lebi doeloe kete-moeken Ngo Boen Khoa, serta toetoerken maksoed kedadengannja.

Ngo Boen Khoa poen sigra berdjalan masoek ka dalem kraton, djoempaken baginda Seng Tjong, sambil merapport katanja:

„Moehoen Pihe mendapat taoe, bahoen sekarang ada dateng dari Hoen Lam residentie Hoen Tjioe Hoe afdeeling Koen Beng Koan, ampoenja Tie Koan, An Tjong Siang katanja lagi mengantar Beng Lee Koen balik dalem kota radja. Marika ini waktoe ada menoejdoe di loear pintoe Ngo Boen aken menanti titah.”

Mendenger rapportan begitoe, dalem hatinja baginda diam - diam djadi merasa geli sambil berkata saorang diri:

„Soeda njata Lee Siang itoe ada Beng Lee Koen, tapi sekarang kombali ada orang prempoean jang tiada takoet mati, brani dateng aken tjoba menipoe pada satoe keizer, Hm!”

Sigra djoega baginda titah panggil mengadep itoe An Tie Koan berserta Beng Lee Koen. Dengan tiada berajalan lagi Ngo Boen Khoa sigra balik keloeaer boeat menjampeken titah baginda.

Begitoelah sebentar lagi, An Tie Koan keliatan soeda membawa Beng Lee Koen bersama-sama masoek ka dalem kraton Kim Loan Tian. Apabila sampe di depan tangga

kaemasan. An Tie Koan berloetoet di depan dan Hang Lam Kim berloetoet di sebelah blakang boeat mendjalanken itoe oepatjara berdjoempa.

Baginda keloearken titah soepaja orang boleh bangoen berdiri, An Tie Koan diidzinken berdiri menoenggoe di satoe samping, melaenken Beng Sie dipanggil dateng lebi deket, serta perkenanken dia boleh mengangkat kapalanja dengan terbebas dari segala kedosaän.

Hang Lam Kim djoega zonder banjak tjintjong lantas angkatin kapalanja mendongak ka atas. Baginda djadi sedikit terprandjat kerna merasa parasnja itoe gadis ada lima bagian mirip dengan gambaran, tjoemalah iapoenja penggawakan badan dan moeka ada lebi gemoek dan lebi berisi, tiada seperti Lee Siang jang berbadan koeroeslangsing. Tapi diliat dari sini, tiada bisa disangkal poela tentoenja ia itoe ada poetri-nja orang hartawan.

Tatkala mana, Lee Siang jang ada berdoedoek di bagian kanan, koetika pertamata-ma mendapat denger rapportan dari Ngo Boen Khoa, djoega toeroet merasa geli dalam hatinja, tapi setelah menampak parasnja sang gadis ada lima bagian mirip dengan

gambarnja sendiri, diam-diam ia djadi merasa girang, kerna djikaloe ini gadis sampe bisa kedjadian menika pada Tiong Hauw Ong, ia djadi mendapat kesempatan boeat berlambat lagi doea-tiga taon, baroe menjalin pakean.

Kemoedian dengan moeka bersri-sri, Lee Siang berbangkit dari kedoedoekannja mengadep pada Tiong Hauw Ong, mengangkat kedoea tangannja membri slamet, ia mengoe-tjap dengan soera njaring :

„Tiong Hauw Ong, Kiong Hie ! Kaoepoenja Hoedjin jang pertama sekarang soeda moentjoel. Inilah boleh dibilang pengharepan orang dikaboelken oleh Toehan jang mahakoeasa !”

Baginda djoega menggoenaken itoe kesempatan mendesek pada Tiong Hauw Ong, sambil bersabda katanja :

„Beng Sie sekarang telah dateng, bolehlah Keng lekas-lekas mentjari hari baek aken melangsoengken itoe perkawinan, soepaja Tim djoega bisa toeroet merasa seneng dalam hati.”

Itoe hari, amat kebetoelan Boe Hian Ong bersama poetranja, begitoe djoega Beng Soe Goan dengan anaknja, antero pada toeroet bersidang di keradjaän. Marika poen

rata-rata merasa betoel itoe gadis mempoe-njai paras jang lima bagian mirip dengan Beng Lee Koen sedjati.

Tapi Tjong Hauw Ong keliatan madjoe berloetoet di hadapan baginda sambil me-rapport katanja :

„Ini prempoean tjoema ada kira-kira lima bagian sadja mirip dengan gambar, amat bisa djadi dia ini boekan ada Beng Sie. Sin tiada brani sembarangan mengakoe boeat mempermaenken satoe djoendjoengan.“

„Ha, doeloenja Tim djoega perna mem-bilang,“ berkata lagi baginda dengan ketawa, „gambar dari romannja jang ditoelis oleh tangannja sendiri, sedikitnja tentoe ada di-lebi-lebiken atawa diroba, mana bisa diharep aken mirip betoel-betoel? Djanganlah Keng terlaloe koekoeh pada anggapan sendiri! Apa poela satoe anak prempoean jang soeda masoek golongan prawan, pastilah parasnja aken tiada bisa disamakan sebegimana se-belonnja dia teritoeng sebagai satoe prawan.“

Sekoetika itoe, Tjong Hauw Ong merasa boleh djadi djoega perbilangannja baginda ada betoel, maka ia lantas membilang poela katanja :

„Kaloer bener dia ada Beng Sie, tjobalah titah aken dia mengenalin ajahnja sendiri,

dengan begitoe djadi bisa lekas ketaoean toelen atawa palsoenja.“

Baginda djadi mengira inilah ada satoe soeal jang soeker bagi itoe gadis, kerna ia tentoe tiada aken bisa kenalken pada Beng Soe Goan, tapi baginda toch tiada bisa ber-boeat laen, hanja terpaksa menanja djoega pada Hang Lam Kim katanja :

„Tjong Hauw Ong ingin kaeo tjoba mengenalin ajahmoe sendiri, sedeng kaeo soeda terloenta-loenta sekean taon lamanja di laen tempat, Tim koeatir brangkali kaeo tiada bisa lantas mengenalin poela ajahmoe.“

Hang Lam Kim merasa bersoekoer boeat baginda poenja kemoerahan jang sengadja memboeka djalan boeat dia gampang lolos-ken diri djikaloe perloe, tapi sebaliknja de-ngen tiada bersangsi-sangsi ia menjaoet ka-tanja :

„Maskipoen Sin Tjhiap soeda idoeper ter-loenta-loenta sekean lama, tetapi itoe per-hoeboengan pengrasaän antara ajah dan anak jang soeda tertjipta sedari terlahir, soekerlah bisa terlinjap, masakah Sin Tjhiap boleh ti-da bisa mengenalin lagi pada ajah sendiri.“

„Seande bener kaeo bisa mengenalin,“ ber-sabda lagi baginda dengan koerang pertjaja, „tjobalah kaeo lantas kenalken jang mana

ada ajahmoe?"

Hang Lam Kim menerima ini titah, laloe balikin dirinja serta lebi doeloe memandeng ka sebelah barat. Inilah membikin baginda djadi merasa sedikit terkedjoet, sebab berpendapetan ini gadis soenggoe Lihaij koe-atir orang bersemboenji di sebelah barat, dari itoe ia mentjari terlebi doeloe ka itoe djoeroesan.

Samentara itoe, Lam Kim setelah memandeng ka barat tapi tiada dapetken orang jang ditjari, laloe ia ganti mengawasin ka sebelah timoer. Dan Beng Soe Goan kerna meliat itoe Hang Sie ada berparas lima-anem bagian mirip dengan poetrinja, dalem hati poen timboel sedikit pengrasaän bersangsi, hingga itoe koetika traoeroeng pada aermoekanja ada mengoendjoek perobahan jang gampang terliat. Maka Hong Lam Kim sebegimana atas ketrangan dari Hauw Ngo soeami-istri, Beng Soe Goan poenja roman dan penggawakan seperti telah tertjitak di depan matanja, lagian meliat itoe perobahan jang tertampak pada orang poenja aermoeka, zonder bersangsi lagi sigra djoega ia mendeketin, tarik pada Soe Goan dengan pelahan, sembari menangis katanja:

„Oh, Hoetjin, kesian sekali Poet Hauw



TIONG HAUW ONG mengoendang
goeroe memereksa sakit.

Lie, sesoeda sekean taon idoeep terloenta-loenta dan menanggoeng berbagi-bagi kesengsaraän, baroe ini hari bisa berdjoempa poela."

Baginda djadi semingkin terkedjoet dan berangepan tiadakah ini gadis ada satoe achlinoedjoem jang pande? Kemoedian baginda bersabda pada Soe Goan :

"Ja, Beng Keng, tiada bisa disangkal lagi tentoelah ini ada Keng poenja poetri, Lee Koen."

Alangkah mendongkolnja Beng Soe Goan atas itoe kedjadian, tapi ia lantas membilang pada Hang Lam Kim :

"Soedelah, djangan kaeo berlakoe sembarangan ! Seande betoel kaeo ada anakko, tjobalah kenalin poela kaeopoenja enko ?"

Si gadis poen trima baek itoe prenta, demikianlah kombali dari kiri ia mentjari teroes sampe ka kanan, samentara Beng Ke Leng jang djoega bersangsian dalem hatinja, tiada heran pada aermoekanja poen ada ter-tampak perobahan

Kemoedian Hang Lam Kim lantas madjoe hampirin pada Ke Leng, sembari menarik orang poenja oedjoeng badjoe, ia membilang katanja dengan roepa soenggoean :

"Ko-ko, tentoenja kaeo bisa mengenalin

ademoe ini?"

Beng Ke Leng djadi merasa amat terprandjat, seraja berkata:

„Ha, kae ade siapa? Soenggoe begitoe brani kae mengerdjaken ini perboeatan mempermaenken baginda keizer, tiadakah kae takoet pada hoekoeman berat?"

Berbareng habisnja ini oetjapan, Ke Leng lantas madjoe berloetoet di hadapan baginda, sembari merapport katanja:

„Ini prempoean sebenernja boekan ada Sin poenja ade, moehoen Pihe soedi keloe-arken titah boeat lakoeken penjelidikan kerasserta membri hoekoeman seadil-adilnja."

„Menilik dari keadaännja, ini gadis terang sekali ada Beng Lee Koen," bersabda baginda keizer, „apalagi djika menginget siapakah jang begitoe nekat brani mendjoestaken pada satoe keizer."

Beng Soe Goan djadi termenoeng boeat sedjoeroes lamanja, achir-achir seperti orang jang baroe dapetken seroeпа pikiran, ia lantas menanja katanja:

„Djika betoel kae ada akoepoenja anak, tjobalah toetoeerken seringkesnja apa jang soeda terdjadi atas kedjadian jang soeda-soeda berhoeboeng dengan perdjalanannoe."

Hang Lam Kim poen lantas menoetoerken

satoe-persatoe, jalah moelai dari tanggal Sha-gwee Tjhe sha mengadoe pana tetepin perdjodoan; tanggal Tjhe-pek Tjin Po Tjin sebagai djomblang datang mengantar pandjerran; laen taonnja Kie Siang dengan membawa firman baginda memoetoesken perkawinan, sedeng tanggal Sha-gwee Dji-pek dilakoeken pengantaran pandjer dari Lauw Hoe, tapi di Sie-gwee Tjhe-it waktow fadjar ia soeda ganti pakean dan lari minggat dari gedongnja; sesoeda terloenta-loenta kian-kemari dengan menangoeng berbagi-bagi kesengsarään, achirnja ia beroentoeng ketemoeken pada Hang Liong, jang kasi ia tinggal menoempang dalem roemanja sebagai goeroe pengadjar dalem ilmoe soerat; sampe di tanggal Lak-gwee Dji-dji, waktow Hang Liong jang itow koetika ada mendjadi ajah angkatnja, merajaken pesta atas peringetan hari lahirnja, saking minoem arak terlaloe banyak ia djadi mabok keras serta tidoer poeles dalem kamar toelis dengan loepa memboeka iapoenja kasoet. Boedjang ketjil laloe memboekaken kasoetnja dari mana moentjoel itow sepasang kasoet soelaman jang ketjil, sehingga kemoedian resia dari penja-roennja djadi ketaoean. Di itow koetika ia lantas belaga membilang dirinja ada satoe

gadis dari familie Ong, oleh kerna iapoenja toenangan lagi mengoembara ka tempnt djaoe boeat berdagang, sedeng kedoea orang toea-nja jang tiada sabaran atawa boleh djadi djoega sebab temaha dengan pandjeran jang berharga besar, paksa padanja boeat menika laen orang, tapi ia sendiri hendak mendjaga betoel kesoetjian dirinja sebagai satoe prempoean jang setia, tiada soeka menoeroet itoe poetoesan, malah lantas lari minggat dari roemanja, Hang Wangwe bersama istrinja merasa kesian aken dirinja jang hadepin nasib begitoe roepa, berbalik laloe pandeng dirinja sebagai anak poenggoet prempoean dan perlakoeken padanja dalem segala kemanisan dan ketjintaän, mirip pada anaknja sendiri.

„Aken tetapi,“ berkata Beng Soe Goan, „pada taon jang berselang, Tjong Hauw Ong bersama ajahnja telah balik poelang ka dalem keradjaän setelah menaloekin negri Tiau-w Sian, dengan perolehken pengoerniaän gelaran radja moeda, seloeroe negri rata-rata soeda mendengar ini hal, moestail amat jang kae tiada mendapat denger atawa tiada mae lantas mengenalkan asal - oesoelmoe; sebaliknja menoenggoe sampe sekarang ini baroe kae mae oendjoekin dirimoe dan

dateng kemari. Apakah sebabnja dan tjobalah menerangkan lebi djaoe?”

„Sewaktoe menerima itoe gelaran radja moeda, anak soeda tiada mae bitjaraken terang ini hal, jalah ingin menjoba begimana hari dan pengrasaännja toenangankoe,“ djawab Hang Lam Kim dengan ringkes.

„Koetika itoe taon kae minggat dari roema,“ tanja lagi Beng Soe Goan, „adakah kae perna meninggalkan barang apa-apa?”

Lam Kim poen lantas toetoerken halnja ia ada tinggalken selemba gambaran berikoet satoe soerat boeat voorstelken So Jan Swat gantiken dirinja keloea menika. Lebi djaoe ia djoega bisa membatja dengan betoel itoe sairana jang ada tertoeelis pada gambaran terseboet.

Baginda Seng Tjong begitoe poen Lee Siang, semoea merasa amat bimbang dalem hatinja, tiadakah ini gadis ada saorang gaib jang bisa mengetahoei dan ramalken segala apa jang telah kedjadian. Begitoe lah dengan soera ampir berbareng, baginda dan Beng Tong kedengeran telah membilang:

„Njatalah terang sekali ini gadis ada Beng Lee Koen, maka Beng Kong djanganlah bersangsi-sangsi poela.”

„Itoe waktoe, Beng Soe Goan djadi mi-

rip seperti orang bisoe makan obat jang paling pait, hingga tiada bisa menjeritaken tentang itoe rasa jang tiada enak. Maoe menanja poela ini - itoe, rasanja bakal tiada bergoena, kerna tiada ada harepan aken bisa bikin djato itoe gadis. Apabolehboeat achirnja Beng Soe Goan terpaksa merapport lagi di hadapan baginda katanja :

„Satoe anak prempoean jang terpelicara hingga oesia doea atawa tigablas taon, sigra djoega dateng itoe perpisaan antara bagian loear dan dalem, maka pertemoean dan pertjampoeran dari satoe ajah dengan anak prempoeannja moelai itoe tempo poen mendjadi seperti berwates. Apalagi dia soeda minggat dari roema sekean taon lamanja, membikin Sin moesti hadepin sedikit kesoe-keran boeat bisa lantas mengenalkan padanja dengan betoel. Biarlah Sin nanti panggil Sin poenja istri dateng kemari; tentoelah bisa mengenalkan toelen atawa palsoenja.“

Baginda djadi merasa geli sekali bagi Beng Soe Goan ampoenja kegoblokan begitoe roepa, kerna anak sendiri soeda tiada bisa kenalkan dengan betoel.

(Aken disamboeng).

